

पत्रसं च्वःगु निगूगु पौ म्हसीका

पत्रसं थ्व निगूगु पौ न्हापायापिं हे विश्वासीतयत् च्वःगु खः। थ्व पौया मू उद्देश्य फताहा गुस्तयसं याःगु ज्या व इमिसं ब्यूगु शिक्षां ब्वलंगु मभिगु खँलिसें ल्वायेगु खः।

येशूयात खंपिं व वयकःयागु शिक्षा थःगु हे न्हायपनं न्यनातःपिनिपाखें इमिसं परमेश्वर व प्रभु येशू ख्रीष्टयागु खँ बांलाक स्यनाः कयातये धुंकल। थ्व हे विश्वासयागु बः कयाः इमिसं थुकथं फताहा गुस्तयगु शिक्षा ज्यालगय् मजू धकाः सीके फइ धकाः पत्रसं ध्वाथुइक कनातःगु दु। पत्रसं अप्वः यानाः ख्रीष्ट हानं लिहां वइ मखुत धकाः धयाजूपिनिगु खँ न्ह्यथनातःगु दु। ताःई तक पिआ च्वनेमाल धायेवं वयकः झाइ हे मखुत धयागु खँ जुइ मखु, बरु वयकः ला परमेश्वरं धयादी थें “सुं नं नाश जुइ म्वाःलेमा, तर फुक्कं थथःगु पापं लिचिलाः वयेमा” धकाः पिआच्चनादीगु खः। थ्व पौ रोमं च्वःगु खः।

धलः पौ

न्ह्यखँ १:१-२

परमेश्वरं सःतादीगु १:३-२१

फताहा गुस्त २:१-२२

ख्रीष्ट दक्वसिबय् लिपा झाइगु खँ ३:१-१८

२ पत्रस

पत्रसपाखें ज्वजलपा

1 येशू ख्रीष्टया दास व प्रेरित सिमोन पत्रसयापाखें झी परमेश्वर व झीत मुक्ति बियादीम्ह येशू ख्रीष्टयागु धार्मिकतां यानाः जिमिसं थें तःजिगु विश्वास काये खंपिं फुक्कसित ज्वजलपा।

2 परमेश्वर व झी प्रभु येशूयात म्हसीका वलिसे छिमित दया माया व शान्ति अप्वः दयावनेमा।

परमेश्वरं सःतादीगु व ल्ययादीगु

3 पवित्र जुयाः म्वायेत माःगु फुक्क खँ झीसं परमेश्वरया शक्ति हे कयाच्चनागु दु, छायाःसा थःगु इज्जत व गुण बीत सःतादीम्ह परमेश्वरयात झीसं म्हस्यु।

4 थथे वय्कलं झीत तःधंगु व तःजिगु आशिष बियादी धकाः बचं बियादीगु दु। वय्कलं हे धयादीकथं झीपिं परमेश्वर थें जुइ फइ, अले संसारयागु लोभ लालचं यानाः स्यनीगुपाखें बचय् जुइ फइ।

5 अयजूगुलि छिमिसं विश्वास यानाच्चवनाः जक मगाः, भिपिं जुइत नं कुतः या। अले हानं भिपिं जक जुयां नं मगाः, ज्ञान नं दयकि।

6 अथे हे ज्ञान जक दयां नं मगाः, चालचलन नं भिका जुइमाः। चालचलन भिनां जक मगाः, मन थातं तया च्वनेमाः। मन थातं तयां जक मगाः, परमेश्वरयात मानय् नं यायेमाः।

7 परमेश्वरयात मानय् यानाः जक मगाः, विश्वासीतय्त दया माया याये फयकेमाः। अले हानं विश्वासीतय्त जक मखु, विश्वासी मखुपिन्त नं माया याये फयकेमाः।

8 थ्व फुक्क याना जूसा छिपिं यक्व ज्या याइपिं व फल सयकीपिं जुइ। अले प्रभु येशू ख्रीष्टयात छिमिसं बांलाक म्हसीके फइ।

9 थथे मयाइपिं मनूत ला मिखा कांपिं हे धाःसां छुं पाइ मखु। इमिसं थःगु पुलांगु पाप सिलाछवये धुंकल धयागु नं ल्वःमंके धुंकी।

10 अयजूगुलि यःपिं दाजुकिजापिं, छिमित परमेश्वरं हे सःताः ल्ययादीगु खः धकाः क्यनेत कुतः या। थथे यात धाःसा छिपिं गुबलें हे क्वदली मखु।

11 अले झीत मुक्ति बियादीम्ह झी प्रभु येशू ख्रीष्टयागु न्ह्याबलें दयाच्चनीगु राज्यय् छिपिं नं दुहां वने दइ।

12 अयजूगुलि थ्व खँ फुक्कं छिमिसं स्यू, अले छिमिसं विश्वास यानाच्चंगु सत्य खँय् छिपिं क्वानुक च्वनाच्चंगु दु धकाः स्यूसां जिं छिमित लुमंके बीत थ्व खँ च्वयाच्चनागु खः।

13 म्वाना च्वंतले थ्व खँ छिमित लुमंका बियाच्चनेगु जितः तसकं भिं ताल।

14 झी प्रभु येशू ख्रीष्टं जितः धयादीगुलि जि अप्वः म्वाइ मखुत धकाः जिं स्यू।

15 जि सिनावने धुंकाः नं छिमिसं थ्व फुक्क खँ न्ह्याबलें लुमंकातये फयेमा धयागु जिगु आशा खः।

ख्रीष्ट तःधं धयागु साक्षी

16 जिमिसं येशू ख्रीष्टयागु तःधंगु शक्ति व वय्कः हानं झायादी तिनि धकाः छिमित धयागु खँ मनूतय्सं कंगु बाखं मखु। वय्कः गुलि तःधं धकाः जिमिगु मिखां हे खनागु दु।

17 दकलय् तःधंम्ह परमेश्वर बाःनं येशूयात तःधंकाः थथे खँ ल्हानादीगु जिमिसं हे न्यनागु खः — “थ्व जि यःम्ह काय् खः। थ्व खनाः जि तसकं लयता।”

18 पवित्रगु पर्वतय् जिपिं वय्कः नाप दुबलय् स्वर्ग धयाहःगु थ्व खँ जिमिसं हे ताःगु खः।*

19 अय्जुगुलि न्हापायापिं अगमवक्तातय्गु खँ सत्य खः धकाः जिमिसं झन बांलाक सिल। थ्व खँ छिमिसं न्यंगु नं तसकं हे बांलात, छायाधाःसा इमिसं धयावंगु खँ ला सुथ मज्जुतले खिउँथाय् च्यानाच्चवंगु मत थें खः। अले छिमिगु नुगलय् थिनाच्चवंगु सुथसिगु नगु खः।

20 दकलय् न्हापालाक अगमवक्तातय्सं धयावंगु खँ इमिसं यसें धयावंगु मखु, परमेश्वरं धाय्कूगु खः धकाः छिमिसं थुइका तये माल।

21 अगमवक्तातय्सं धाःगु खँ मनूतय्सं यसें धाःगु मखु। इपिं परमेश्वरया मनूत खः। अय्जुगुलि पवित्र आत्मां इमित धयादीगु खँ जक इमिसं धयावंगु खः।

2

मखुगु खँ स्यनीपिं मनूत

1 न्हापा न्हापा नं मखुगु खँ स्यना जुइपिं अगमवक्तात दयावःगु खः। अथे हे छिमिगु पुचलय् नं मखुगु खँ स्यना जुइपिं मनूत दयावइतिनि। अज्याःपिं मनूतय्सं छिमित मखुगु खँ जक स्यनाबीगु कुतः याइ। इमित मुक्ति बियादीम्ह येशू ख्रीष्टयात हे इमिसं त्वःतावनी, अले याकन हे स्यनावनी।

2 अथे इमिसं धाःगु मखुगु खँ न्यनाः यक्व मनूत मभिगु लँय् वनी। अथे मभिगु लँय् वनाः मभिगु ज्याखँ यानाजूपिन्सं यानाः मनूतय्सं सत्ययागु लँयात हे मभिं धकाः धाइ।

3 अज्याःपिं मनूतय्सं लोभलालचय् लानाः छिमिके हेय्का कायेत मखुगु खँ दय्काः स्यनी। न्हापांनिसें हे अज्याःपिं मनूत दोषी खः धकाः परमेश्वरं धयादीगु दु। अय्जुगुलि अज्याःपिं मनूत याकनं हे हासनास जुयावनी।

4 पाप याःपिं स्वर्गदूततय्त हे नं परमेश्वरं ल्यंका मदिसे नरकय् छवयादिल। न्याय याइगु दिं मवतले इमित नरकया खिउँथासय् चिनाः तया तल।

5 न्हापा न्हापा परमेश्वरं थ्व संसारय् च्वंपिं मभिपिं मनूतय्त लः बाः वय्काः स्याना छवयादिल। अबलय् परमेश्वरयात मानय् या धकाः स्यनेकने याना जूम्ह नोआ व वया न्हयम्ह मनूतय्त जक परमेश्वरं बचय् यानादिल।*

* 1:18 १:१७-१८ मती १७:१-५; मार्क ९:२-७; लूक ९:२८-३५ * 2:5 २:५ उत ६:१-७:२४

6 अथे हे सदोम व गमोरा धाःगु शहरतयत नं परमेश्वरं मिं छवयकाः भस्म यानादिल। मभिंपि मनूत फुक्कं अज्याःगु हे गति जुयाः सिनावनेमाली धकाः संसारय् च्वंपि मनूतयत ख्याच्चः बियादिल।✧

7 सदोम शहरय् च्वंम्ह लोत भिंम्ह मनूयात धाःसा परमेश्वरं बचय् यानादिल। अन शहरय् च्वंपि मनूतयसं याना जूगु मभिंगु ज्याखँ स्वयाः लोत वाक्क हे वय्काच्चंगु खः।✧

8 थ्व लोत भिंम्ह मन् जूगुलि अन च्वंपि मनूतयसं न्हियान्हिथं मभिंगु मभिंगु ज्याखँ जक याना जूगु खनाः तसकं हे हीमी चायाच्चंगु खः।

9 भिंपि मनूतयत परमेश्वरं दुःखकष्ट जुइबलय् बचय् यानादी। अले मभिंपि मनूतयत न्याय याइगु दि मवतले गथे तयातयेमाः धकाः परमेश्वरं स्यु।

10 अप्वः यानाः थःत जक यःथें मभिंगु बांमलाःगु ज्याखँ यानाः व परमेश्वरयागु अधिकारयात हेपय् यानाजुइपि मनूतयत वय्कलं तःधंगु सजॉय बियादी।

अज्याःपिं मखुगु खँ स्यनीपिं मनूत तसकं तःधंछुइमाः। अले इमिसं थः स्वयाः तःधंपिन्त हनाबना तइ मखु, हेपय् याना जुइ।

11 अज्याःपिं मखुगु खँ जक स्यना जुइपिं मनूत स्वयाः तसकं तःधंपि व शक्ति दुपिं स्वर्गदूतयसं नं प्रभुया न्ह्यःने इमित ब्वःबी मछाः।

12 इपिं ला पशुत थें च्वं, अले इमिसं बिचाः याये मसः। पशुत थें ज्वंकाः स्याकेत हे इपिं बूपिं खः। इमिसं मथूगु मस्युगु ज्याखँय् परमेश्वरयात ब्वः ब्यू जुइ। अय्जूगुलि इपिं जंगलय् च्वंपिं पशुत थें हासनास जुयावनी।

13 कपिन्त दुःखकष्ट बिया तःगुया पलेसा इपिं नं दुःखकष्ट हे फयाः सिनावनी। न्हिनय् हे इमिसं थःत यःथें मोजमज्जा याना जुइ। इपिं नाप नयेत्वने यायेगु हे छिमित मछालापुगु व हेला जुइगु खँ खः। इमिसं न्ह्याबलें थगय् यायेत जक स्वयाच्च्वनी।

14 इमिसं न्ह्याबलें व्यभिचार यायेत जक स्वयाच्च्वनी। न्ह्याक्व हे पाप याना जूसां इपिं गुबलें लुमधं। इमिसं बमलाःपिं मनूतयत थःगु ल्हातय् काइ। अले इमिगु मन हे लोभ यायेगु ज्याय् लाये धुंकल। परमेश्वरयागु सराः इमित हे लाइ।

15 इपिं भिंगु लँपु त्वःताः मभिंगु लँपुइ वनाच्चंगु दु। अगमवक्ता जुयाः नं मभिंगु ज्या यानाः धिबा कमय् यायेत स्वःम्ह बओरया काय् बालामयागु लँपुइ इपिं वनाच्चंगु दु।

16 बालामं थज्याःगु पाप याये मते धकाः ब्वः फये माल। अले बालामया गधानं मनूया सलं नवानाः व अगमवक्तायागु वें बिचाःयात दिका बिल।✧

17 थज्याःपि मनूत सुनावने धुंकूगु बुंगाःचा थें खः, अले हानं इपि ग्वःफसं पुइके यंकूगु सुपाँय् थें खः। इमिगु निति परमेश्वरं तसकं खिउँसे च्वंगु गाः दय्कादीगु दु।

18 इमिसं तःधंछुयाः फुइँफाँय् याना जुइ। अले नकतिनि हे जक पापं लिचिलाः धर्मीं जुइत कुतः यानाच्च्वपि मनूतयत्त नं लोभ क्यनाः मोजमज्जा यायेगुलिइ साला हइ।

19 इमिसं हे हानं मुक्ति बीगु धकाः धयाजुइ, तर थःपि हे पापया दास जुया जुइ, छायाःसा मनूतयत्त छुकिं त्याकल मनू उकिया हे दास जुइ।

20 अले हानं झीत मुक्ति बियादीम्ह प्रभु येशू ख्रीष्टयागु भिगु खँ न्यनाः थुइकाः संसारयागु मभिंगु पापी ज्याखँ त्वःता च्वनेधुंकूपि मनूत हानं थ्व हे संसारयागु मभिंगु पापी ज्याखँ तं यायेत वन धाःसा इपि न्हापा स्वयाः तसकं मभिपि जुइ।

21 थज्याःपि मनूतयसं थःपिन्त बियातःगु पवित्र आज्ञायात सीक सीकं त्वःताछवयेगु स्वयाः ला गुब्सं हे मन्यंगु जूसा तसकं बांलाइगु खः।

22 थुपि धापू कथं हे इमित जूगु दु – “खिचां थःम्हं ल्ह्वःगु थःम्हं तं नइ” अले “म्बःल्हुका ब्यूमह फा हानं नालय् तं वनाः बुतुबुलाः सनी।”☆

3

प्रभु हानं झायादी तिनि

1 यःपि दाजुकिजापि, थ्वनापं जिं छिमित पौ च्वयाहयागु निकः जुल। निगुलीं नं जिं छिमिगु यचुगु मनयात लुमंका बियाः न्ह्यलं चायकेत थ्व खँ च्वयाहयागु खः।

2 पवित्रपि अगमवत्कगतयसं न्हापा न्हापा धयाथकूगु खँ छिमित लुमंकाबीत जिं कुतः यानाच्च्वनागु खः। अले हानं प्रेरिततयसं न्यंका थकूगु मुक्ति बियादीम्ह प्रभुयागु आज्ञायात लुमंका बियाच्च्वनागु खः।

3 दकलय् न्हापां थ्व खँ सीकि, लिपा लिपायागु दिनय् थःत यःथें सना जुइपि मनूत वइतिनि। अले थज्याःपि मनूतयसं छिमित गिजय् याइ।☆

4 इमिसं थथे धाइ – “येशू झायादी धकाः धयागु मखु ला? ग्व, गन दु येशू? जिमि तापाःबाज्यापि सिनावने धुंकल। सृष्टि याःबलय् निसैं थौं तक नं अथे हे तिनि, छुं नं मपाः।”

5 परमेश्वरं नवानाः स्वर्ग सृष्टि यानादिल, अले पृथ्वी लखं दय्कादिल धकाः सीक सीकं इमिसं मस्यू थें याना जुल।☆

6 थ्व पृथ्वी लखं हे दयावःगु खः, अले हानं लखं यानाः हे अबलययागु संसार नाश जुल।✧

7 परमेश्वरयागु वचनं हे आःयागु आकाश व पृथ्वीयात मिइ छवय्केत बचय् यानातःगु दु। पापी मनूतयत न्याय यानाः नाश मयातले आकाश व पृथ्वी दयाचवनी।

8 यःपिं दाजुकिजापिं, थ्व खँ ल्वःमंके मते – प्रभुयात छन्हु नं द्रःछि दँ थें, अले द्रःछि दँ नं छन्हु थें खः।✧

9 गुम्ह गुम्हयसिनं मतिइ तः थें प्रभुं थःम्हं धयादी थें यायेत लिपा लाकादी मखु। अथेसां छिपिं सुं नं नाश मजुइमा, अले फुक्कसिनं पश्चाताप यायेमा धकाः वय्कः पियाचवनादीगु खः।

10 प्रभु झायादीगु सुनानं सी मखु। अबलय् आकाश तसकं सः वयाः मदयावनी। अले आकाशय् च्वंगु दक्व फुक्कं छवयाः नौ जुयावनी। पृथ्वी व पृथ्वीइ च्वंगु नं दक्व फुक्कं नाश जुयावनी।✧

11 थथे फुक्कं नाश जुया वनीगुलि छिपिं गज्याःपिं मनूत जुयाः म्वानाचवनेमाः? छिमिसं पवित्र जुयाः, थःत परमेश्वरयात देछायाः म्वानाचवनेमाः।

12 परमेश्वर झायादीगु ई पियाच्वँ। अबलय् आकाश छवयाः नौ जुयावनी। आकाशय् च्वंगु फुक्कं क्वानाः नायावनी।

13 थथे जुइ धुंकाः हानं मेगु हे न्हगु आकाश व पृथ्वी दयकादी धकाः परमेश्वरं धयादीगु दु। थ्व न्हगु आकाश व पृथ्वीइ धर्मीपिं मनूत जक चवने खनी। थ्व हे न्हगु आकाश व पृथ्वीयात झीसं पियाचवनागु खः।✧

14 अयजुगुलि यःपिं दाजुकिजापिं, थथे गुबलय् जुइ धकाः पिया चवनीपिं जुयाः छिमिसं प्रभुयात लयताय्केत कुतः याना च्वँ। पापी ज्या याना मजुसे पवित्र जुयाच्वँ। थुकथं छिपिं परमेश्वर नाप मिलय जुयाच्वँ।

15 थौं तक झाया मदिसे प्रभु पियाचवनादीगु पापी मनूत बचय् जुइमा धकाः खः। झी यःम्ह किजा पावलं नं परमेश्वरपाखें बुद्धि कयाः थ्व हे खँ च्वयातःगु खः।

16 पावलं च्वयातःगु पौलयं नं थ्व हे खँ न्ह्यथनातःगु दु। गनं गनं पावलं च्वयातःगु खँ थुइकेत थाकु। बांलाक मस्यूपिं मनूतयसं व क्वान्तुक विश्वास यानाचवने मफुपिं मनूतयसं ला च्वयातःगु खँया अर्थ हे हीका छवइ। थथे हे इमिसं धर्मशास्त्रयागु अर्थ नं हीका छवइ। थथे इमिसं थःत थःम्ह हे स्यंकी।

✧ 3:6 ३:६ उत ७:११ ✧ 3:8 ३:८ भज ९०:४ ✧ 3:10 ३:१० मर्ती २४:४३; लूक १२:३९; १ थेस ५:२; प्रका १६:१५ ✧ 3:13 ३:१३ यशै ६५:१७; ६६:२२; प्रका २१:१

17 यःपिं दाञ्जुकिजापिं, छिमिसं थ्व फुक्क खँ सी धुंकल, अयत्नं होश यानाच्चँ। मखुसा मभिंपिं मनूतयगु खँय् लानाः छिपिं क्वान्तुक च्वने मफयाः थःगु थासं कुतुं वनी।

18 झी प्रभु व मुक्तिदाता येशू ख्रीष्टयागु दया माया अप्वः दयावनेमा। अले छिमिसं वय्कःयात अझ नं बांलाक म्हसीका वने फयेमा।

वय्कःयागु नां आः व सदां तःधना च्वनेमा। आमेन।

Newar
Newar: Newar (Bible)

copyright © 2024 Nepal Bible Society and Wycliffe Bible Translators, Inc.

Language: Newar

Contributor: Wycliffe Bible Translators, Inc.

All rights reserved.

2025-05-17

PDF generated using Haiola and XeLaTeX on 16 May 2025 from source files
dated 17 May 2025

838cc630-4ccf-5055-be45-10a98a141cc7